



## Pistill sveitarstjóra



Kæru lesendur Áveitunnar

Líkt og aðra mánuði hefur septembermánuður verið viðburðarríkur hjá sveitarfélaginu Flóahreppi.

Sveitarstjórn fundaði í upphafi mánaðarins. Á fundinn mætti nýskipaður **byggðapróunarfulltrúi** neðri hluta Árnessýslu sem er sveitungi okkar Ingunn Jónsdóttir í Hallanda. Byggðapróunarfulltrúi getur nýst okkur á ýmsan hátt sem stuðningur við þróun byggðar á okkar svæði með virkri þátttöku hagaðila svo sem íbúa, sveitarfélaga og SASS. Byggðapróunarfulltrúi veitir ýmiskonar ráðgjöf fyrir sveitarfélagið og íbúa þess. Nánari upplýsingar um byggðapróunarfulltrúa á Suðurlandi má finna hér: <https://www.sass.is/umsass/starfsfolk/>

Vinnuhópur vegna **uppbyggingar** við Flóaskóla hefur verið starfandi í tæpt ár og hefur fundað nokkuð þétt undanfarnar vikur. Auk hefðbundinna funda var farið í heimsókn í Stekkjaskóla á Selfossi til að skoða skólann sem var tekinn í notkun í haust. Hópurinn mun skila af sér tillögum til sveitarstjórnar í október ef allt gengur eftir.

Undirbúningur **fjárhagsáætlunar** næsta árs er kominn af stað. Undirbúningur hefst á samtali sveitarstjóra við forstöðumenn stofnana og deilda innan sveitarfélagsins. Staða núverandi árs er greind og áherslur fyrir komandi ár lagðar. Í ár voru nefndir á vegum sveitarfélagsins einnig beðnar um að koma með innlegg varðandi áherslumál í viðkomandi málaflokkum. Sveitarstjórn ákveður að lokum hvernig fara skuli með fjárheimildir næsta árs og skal samþykkt fjárhagsáætlun komandi árs ásamt áætlun fyrir næstu þrjú ár þar á eftir liggja fyrir í desember. Saman mynda þessar áætlanir fjögurra ára áætlun fyrir sveitarfélagið. Fjárhagsáætlun næsta árs er bindandi ákvörðun sveitarstjórnar um allar fjárhagslegar ráðstafanir og áætlun næstu þriggja ára er heildaráætlun sem mótar áherslumál og stefnu til lengri tíma.

Sveitarstjórn samþykkti á fundi sínum í mánuðinum að taka þátt í sameiginlegum rannsóknarborunum vegna **kaldavatnsöflunar** í Kaldárhöfða í Grímsnes- og Grafningshreppi. Ásamt Flóahreppi og Grímsnes- og Grafningshreppi tekur Sveitarfélagið Árborg þátt í verkefninu. Með þessu er verið að hugsa um vatnsöflun til framtíðar fyrir svæðið.

Fyrsta greiðsla úr **Úrvinnslusjóði** vegna sérstakrar söfnunar í janúar-mars barst í júlí. Íbúar Flóahrepps söfnuðu 5.095 kg á þessu þriggja mánaða tímabili eða 7,2 kg á hvern íbúa sem skilaði endurgreiðslu til sveitarfélagsins upp á 521.478 kr. Þessi upphæð rennur beint inn í



Þann málaflokk og ef vel gengur í sérstakri söfnun hjá íbúum sveitarfélagsins þá getur það haft áhrif til lækkunar á álögð þjónustugjöld fasteigna vegna sorphirðu. *Við hvetjum íbúa því til að leggja metnað í flokkun en endurgreiðsla frá Úrvinnslusjóði á við pappa, plast, málma og gler.*

Minnt er á grenndargámana fyrir gler og málm sem standa við Þingborg og Félagslund.

Sveitarstjóri hefur átt áframhaldandi samtali við **Vegagerðina** um þjónustu í sveitarfélaginu. Vegheflun mun fara fram á helstu malarvegum fyrir veturinn og einnig verða kantar slegnir þar sem mesta þörfin er til að sporna við snjósöfnun við vegina.

Svar barst frá Vegagerðinni í september vegna bókuunar sveitarstjórnar um **samgöngumál** í Flóahreppi. Í svarinu kemur fram að Vegagerðin hefli almennt malarvegi amk. tvisvar á ári eða að vori og hausti. Áhersla var lögð á Flóahrepp vegna mölburðar í haust og lauk því verki af hálfu Vegagerðarinnar í september. Einnig er tekið fram í svarbréfinu að stefnt sé að því að uppfæra þjóvegakerfið með aðalbrautir í huga í haust eða vetur og þá með uppsetningu nýrra merkja og breytingum á yfirborðsmerkingum næsta sumar þar sem þar á við.

Sveitarstjóri hefur óskað eftir því að fá að fara með starfsmönnum Vegagerðarinnar í eftirlitsferð til að skoða aðstæður víðsvegar um sveitarfélagið.

Í byrjun október stendur Vegagerðin fyrir samráðsfundi um endurskoðun á vinnureglum **vetrarþjónustu** og mun sveitarstjóri sækja þann fund.

Í fyrstu viku októbermánaðar er **kjördæmavika** þingmanna og munu þingmenn Suðurkjördæmis eiga fund með fulltrúum sveitarfélagsins um hin ýmsu málefni. Nokkuð ljóst er að samgöngumál, raforkuöryggi, kostnaður við flutning raforku í dreifbýli og umræður um ávinning nærsamfélags af nýtingu orkuauðlinda verður ofarlega í huga á þeim fundi ásamt öðrum málefnum sem snerta sveitarfélagið okkar.

Í lok september sótti sveitarstjórn Flóahrepps, ásamt starfsmönnum skrifstofu, **fjármálaráðstefnu** sveitarfélaga sem var haldin í Reykjavík. Á ráðstefnunni voru mörg áhugaverð og gagnleg erindi um fjármál, rekstur og hin ýmsu málefni sveitarfélaganna. Samhliða sótti sveitarstjóri ársfund Jöfnunarsjóðs og aðalfund Samtaka sveitarfélaga á köldum svæðum.

Fasteignasvið sveitarfélagsins vinnur nú hörðum höndum að því að sinna **viðhaldsverkefnum** í fasteignum sveitarfélagsins í samræmi við samþykka framkvæmdaáætlun fyrir árið 2023.

Má þar nefna nýja hurð við íþróttainngang og lagfæringu á stéttum við Þingborg, uppsetning á ledkösturum og lagfæring á rennuniðurföllum í Þingborg, lagfæring á anddyri og bætt aðgengi í stóla- og borðageymslu í Félagslund, nýtt gólfefni og málun á sviði í Þjósárverri, lagfæring á gólfi í anddyri leikskólans, uppsetning varmadælu í húsnæði frístundar og lagfæring á kösturum á leik- og sparkvelli við Flóaskóla.



Sveitarstjóri hefur unnið undanfarið með fulltrúum Markaðsstofu Suðurlands við uppfærslu á **áfangastöðum** í Flóahreppi. Í Flóahreppi eru margir áhugaverðir áfangastaðir fyrir innlenda og erlenda ferðamenn en mikilvægt er að sveitarfélög og landeigendur hugi að uppbyggingu slíkra áfangastaða t.d með bættu aðgengi og merkingum til að auka öryggi ferðamanna og styðja við náttúruvernd á svæðum sem eru fjölsóttir.

Tengt þessu máli er vert að benda á að opið er fyrir umsóknir í **Framkvæmdasjóð ferðamannastaða** og eru landeigendur áfangastaða hvattir til að sækja um þar ef áhugi er fyrir hendi á frekari uppbyggingu:

<https://www.ferdamalastofa.is/is/studningur/framkvæmdasjodur-ferdamannastada/upplýsingasida-um-umsoknir>

Umsóknarfrestur í **Uppbyggingarsjóð** Suðurlands rennur út kl. 16:00 þriðjudaginn 3. október. Einstaklingar og atvinnurekendur eru hvattir til að sækja um í sjóðinn. Áhersluverkefni haustúthlutunar eru verkefni sem tengjast menningu ásamt atvinnuþróun og nýsköpun. Sjá nánar hér: <https://www.sass.is/uppbyggingarsjodur/>

Fulltrúar sveitarfélagsins fengu boð frá eigendum og framkvæmdaaðilum vegna opunar nýrrar **íbúðabyggðar** í Flóahreppi eða nánar tiltekið í Huldu- og Maríuhólum sem stendur við Skeiðavegin og liggur upp að sveitarfélagamörkum Flóahrepps og Skeiða- og Gnúpverjahrepps. Í þessum fyrsta áfanga verða 17 lóðir settar í sölu af þeim 50 sem eru samþykktar. Að auki eru 15 lóðir í viðbót í ferli og verða því alls 65 lóðir á þessu svæði sem skilgreint er sem íbúðabyggð. Flóahreppur hefur átt mjög gott samstarf við eigendur og framkvæmdaaðila á skipulagstímanum en það er mikilvægt að sveitarfélagið sé vel inni í svona stórum málum enda sveitarfélagsins að bregðast við uppbyggingu innviða og að þjónusta þá íbúa sem hingað munu flytja. Það er ljóst að áhugi á svæðinu er mikill enda teljum við að íbúar Flóahrepps búi við góð lífsgæði og að hér séu góð búsetuskilyrði.

Flóahreppur greiðir **hvatastyrki** að upphæð 30.000 kr tvisvar á ári og er umsóknarfrestur um greiðslur fyrir haustönn til 1. nóvember. Greitt er skv. umsóknum og fullnægjandi fylgigögnum um mánaðarmótin nóvember-desember. Sjá nánar hér:

<https://www.floahreppur.is/is/sveitin-okkar/ithrottir-og-utivist/hvatagreiðslur>

Við opnuðum **ábendingagátt** fyrir íbúa Flóahrepps á heimasíðu sveitarfélagsins en þar má senda inn ábendingar eða athugasemdir svo sem ef eitthvað þarf að laga, eða sem betur mætti fara í þjónustu sveitarfélagsins, ábendingar um færð og aðstæður eða annað sem íbúar vilja koma á framfæri. Starfsmenn Flóahrepps svara ábendingum eða bregðast við eftir aðstæðum. Íbúar eru hvattir að nýta sér þennan möguleika á gagnlegan og uppbyggilegan hátt – allt með það að markmiði að auka skilvirkni, upplýsingaflæði og þjónustu í sveitarfélaginu. Ábendingagátt Flóahrepps má finna hér:

<https://www.floahreppur.is/is/thjonusta/abendingagatt-floahrepps>



Í blálök septembermánaðar stóðu Ungmennafélagið Þjótandi og menningarnefnd Flóahrepps sameiginlega að **Kornskurðarballi** í Félagslundi. Það er von okkar að þetta verði árlegur viðburður. Menningarnefndin mun svo standa fyrir **aðventutónleikum** í byrjun desember en það er nýjung í menningardagskrá sveitarfélagsins sem mun vonandi vekja lukku og vera vel sóttur viðburður.

Að lokum bið ég íbúa og fasteignaeigendur að huga að **undirbúningi fyrir veturinn** líkt og að huga að lausamunum og tryggja að vegir og veghelgunarsvæði séu laus við hluti sem geta valdið vandræðum við snjómokstur í vetur. Þó að það sé fallett haustveður þegar þetta er skrifað og sól í heiði þá vitum við aldrei hvenær veturinn skellur á.

*Með haustkveðju,*

*Hulda Kristjánsdóttir, sveitarstjóri*